

## EUROPAPARLAMENTS- OG RÅDSAVGJERD 2004/387/EF

2009/EØS/9/43

av 21. april 2004

## om samverkande yting av felleseuropeiske elektroniske offentlege tenester til offentlege forvaltningar, føretak og borgarar (IDABC)\*

EUROPAPARLAMENTET OG RÅDET FOR DEN EUROPEISKE UNIONEN HAR —

med tilvising til traktaten om skipinga av Det europeiske fellesskapet, særleg artikkel 156,

med tilvising til framlegget frå Kommisjonen,

med tilvising til fråsegna frå Det europeiske økonomi- og sosialutvalet<sup>(1)</sup>,

med tilvising til fråsegna frå Regionutvalet<sup>(2)</sup>,

etter den framgangsmåten som er fastsett i artikkel 251 i traktaten<sup>(3)</sup>, og

ut frå desse synsmåtane:

- 1) I samsvar med artikkel 154 i traktaten skal Fellesskapet medverke til skiping og utvikling av transeuropeiske nett, for såleis å medverke til å nå dei måla som er nemnde i artikkel 14 og 158 i traktaten og gjere det mogleg for borgarar i Unionen, marknadsdeltakarar og regionale og lokale administrative einingar å fullt ut dra nytte av føremonene med å skape eit område utan indre grenser.
- 2) Å lette mobiliteten for føretak og borgarar på tvers av europeiske grenser medverkar direkte til å fjerne hindringane for fritt varebyte og fri rørsle for personar, tenester og kapital og for at borgarar frå ein medlemsstat fritt skal kunne etablere seg på territoriet til ein annan medlemsstat.
- 3) I samsvar med artikkel 157 i traktaten skal Fellesskapet og medlemsstatane sikre at dei vilkåra som er naudsynte for konkurranseevna til industrien i Fellesskapet, er til stades.

4) Europaparlamentet og Rådet vedtok ved vedtak nr. 1719/1999/EF<sup>(4)</sup> og avgjerd nr. 1720/1999/EF<sup>(5)</sup> ei rekkje tiltak, tverrgåande tiltak og retningslinjer, medrekna fastlegging av prosjekt av felles interesse, med omsyn til transeuropeiske nett for elektronisk datautveksling mellom forvaltningar (IDA). Ettersom det nemnde vedtaket og den nemnde avgjerda sluttar å gjelde 31. desember 2004, er det naudsynt å fastsetje ei ramme for oppfølginga av IDA-programmet slik det vart fastsett i dei nemnde rettsaktene.

5) IDABC-programmet vil byggje på dei gode resultatane til dei føregåande IDA-programma, som har gjort samarbeidet over landegrensene mellom offentlege forvaltningar meir effektivt.

6) Ved skipinga og gjennomføringa av IDABC-programmet, som er ei oppfølging av føregåande IDA-program, bør det takast tilbørleg omsyn til resultatane frå desse programma.

7) Det arbeidet som er gjort innanfor ramma av IDABC-programmet, vil venteleg danne grunnlaget for det vidare arbeidet. Dette saman med dei snøgge teknologiske endringane krev at programmet må kunne tilpassast den framtidige utviklinga.

8) Under møtet til Det europeiske rådet i Lisboa i mars 2000 vart det sett som mål at Den europeiske unionen innan 2010 skal verte den mest konkurransedyktige, dynamiske og kunnskapsbaserte økonomien i verda, og verte i stand til å skape berekraftig økonomisk vekst med fleire og betre arbeidsplassar og større sosial utjamning.

9) Under møtet til Det europeiske rådet i Brussel i mars 2003 vart det peikt på kor viktig det er å knyte Europa saman og såleis styrkje den indre marknaden, og det vart streka under at elektronisk kommunikasjon er ei effektiv drivkraft for vekst, konkurranseevne og skaping av arbeidsplassar i Den europeiske unionen og at det bør gjerast ein innsats for å tryggje denne føremonen og medverke til å nå dei måla som vart fastsette i Lisboa. For dette føremålet bør utviklinga og skipinga av felleseuropeiske elektroniske offentlege tenester og dei underliggjande telematikkneta støttast og fremjast.

(\* ) Denne fellesskapsrettsakten, kunngjort i EUT L 181 av 18.5.2004, s. 25, er omhandlet i EØS-komiteens beslutning nr. 41/2006 av 10. mars 2006 om endring av EØS-avtalens protokoll 31 om samarbeid på særlege områder utenfor de fire friheter, se EØS-tillegget til Den europeiske unions tidende nr. 28 av 1.6.2006, s. 28.

<sup>(1)</sup> TEU C 80 av 30.3.2004, s. 83.

<sup>(2)</sup> TEU C 73 av 23.3.2004, s. 72.

<sup>(3)</sup> Europaparlamentsfråsegn av 18. november 2003 (enno ikkje offentleggjort i TEU). Felles haldning frå Rådet av 18. desember 2003 (TEU C 66 E av 16.3.2004, s. 22) og haldning frå Europaparlamentet av 11. mars 2004 (enno ikkje offentleggjort i TEU). Rådsavgjerd av 30. mars 2004.

<sup>(4)</sup> TEF L 203 av 3.8.1999, s. 9. Vedtaket endra ved vedtak nr. 2045/2002/EF (TEF L 316 av 20.11.2002, 5. 1)

<sup>(5)</sup> TEF L 203 av 3.8.1999, s. 1. Vedtaket endra ved vedtak nr. 2046/2002/EF (TEF L 316 av 20.11.2002, s. 4).

- 10) Det at hindringane for elektronisk kommunikasjon mellom offentlege forvaltningar på alle plan og med føretak og borgarar vert fjerna, medverkar til å betre det europeiske forretningsklimaet, minske den administrative byrda og redusere byråkratiet. Det kan òg oppmuntre føretak og borgarar i Den europeiske unionen til å dra nytte av føremonene med informasjonssamfunnet og til å kommunisere elektronisk med offentlege forvaltningar.
- 11) Auka yting av elektroniske offentlege tenester gjer det mogleg for føretak og borgarar å kommunisere med offentlege forvaltningar utan å ha særskild dugleik innanfor informasjonsteknologi eller førehandskunnskap om korleis ei offentleg forvaltning fungerer eller er bygd opp.
- 12) Innføringa av transeuropeiske telematikknett for elektronisk informasjonsutveksling mellom offentlege forvaltningar, fellesskapsorgan og andre organ, som t.d. europeiske kontor, tenester og organisasjonar som har til oppgåve å fremje interessene til Fellesskapet, bør ikkje sjåast på som eit mål, men som eit middel for å oppnå samverkande informasjonstenester og interaktive elektroniske offentlege tenester på eit felleseuropeisk plan, slik at borgarar og føretak kan dra nytte av føremonene med eit samarbeid mellom offentlege forvaltningar over heile Europa.
- 13) Kommisjonen vil gjennomføre og om naudsynt ajourføre omfattande samråd med alle aktørar for å gjennomføre ei gransking av alle relevante sektorar, med vekt på kva borgarar og føretak treng og kva føremoner dei har, med sikte på å utarbeide ei liste over naudsynte og nyttige felleseuropeiske elektroniske offentlege tenester som kan verte gjennomførde i det tidsrommet som denne avgjerda gjeld.
- 14) Felleseuropeiske elektroniske offentlege tenester gjer det mogleg for offentlege forvaltningar, føretak og borgarar å kommunisere betre med offentlege forvaltningar over landegrensene. Ytinga av desse tenestene krev føremålstenlege, effektive og samverkande informasjons- og kommunikasjonssystem mellom offentlege forvaltningar i tillegg til samverkande forvaltingsmessige skranke- og sakshandsamingsløyser, med sikte på å kunne utveksle, forstå og handsame informasjon i den offentlege sektoren på ein sikker måte i heile Europa.
- 15) Med sikte på yting av felleseuropeiske elektroniske offentlege tenester bør det takast omsyn til føresegnene særleg i europaparlaments- og rådsdirektiv 95/46/EF av 24. oktober 1995 om vern av fysiske personer i forbindelse med behandling av personopplysningar og om fri utveksling av slike opplysningar<sup>(1)</sup> og europaparlaments- og rådsdirektiv nr. 2002/58/EF av 12. juli 2002 om behandling av personopplysningar og personvern i sektoren for elektronisk kommunikasjon<sup>(2)</sup>.
- 16) Det er viktig at det i den nasjonale innsatsen til støtte for elektroniske offentlege tenester vert teke tilbørleg omsyn til prioriteringane til Den europeiske unionen.
- 17) Det er viktig å gjere best mogleg bruk av standardar, offentleg tilgjengelege spesifikasjonar og opne spesifikasjonar for informasjonsutveksling for å sikre ei smidig samverknadsevne og dermed auke føremonene med felleseuropeiske elektroniske offentlege tenester og dei underliggjande transeuropeiske telematikknetta.
- 18) Skipping av felleseuropeiske elektroniske offentlege tenester og dei underliggjande transeuropeiske telematikknetta som Fellesskapet nyttar eller dreg nytte av, er ei oppgåve både for Fellesskapet og for medlemsstatane.
- 19) Det er viktig å sikre eit nært samarbeid mellom medlemsstatane og Fellesskapet, og der det er relevant, mellom fellesskapsorgana og aktørane.
- 20) Tiltaka på fellesskapsplan bør stimulere den positive utviklinga av elektroniske offentlege tenester på eit felleseuropeisk plan og dei tiltaka som krevst på alle relevante nivå, samstundes som det vert teke tilbørleg omsyn til det språklege mangfaldet i Fellesskapet.
- 21) Deltakinga frå alle medlemsstatane i tiltak til støtte for felleseuropeiske elektroniske offentlege tenester som offentlege forvaltningar yter overfor føretak og borgarar, bør fremjast, men det kan òg skipast tiltak som omfattar fleire medlemsstatar, og dei medlemsstatane som ikkje tek del, bør då oppmodast til å ta del seinare.
- 22) Overføringsverdien i høve til liknande nasjonale, regionale og lokale initiativ og yting av elektroniske offentlege tenester innanfor medlemsstatane bør sikrast.
- 23) I handlingsplanen e-Europa 2005, som vart godkjend under møtet til Det europeiske rådet i Sevilla i juni 2002, særleg kapittelet om elektronisk forvaltning, er det streka under kor viktig IDA-programmet er med omsyn til å fremje skipinga av felleseuropeiske elektroniske offentlege tenester til støtte for verksemd over landegrensene som utfyller og utgjer ei ramme for initiativ med omsyn til elektronisk forvaltning på alle relevante nivå.
- 24) For å gjere effektiv bruk av dei finansielle midlane til Fellesskapet må kostnadene ved felleseuropeiske elektroniske offentlege tenester og dei underliggjande transeuropeiske telematikknetta fordelast på ein rimeleg måte mellom medlemsstatane og Fellesskapet.
- 25) Den beste måten å skipe og drive dei felleseuropeiske elektroniske offentlege tenestene og dei underliggjande transeuropeiske telematikknetta på, samstundes som det vert teke omsyn til produktivitet, skjønsemd og fleksibilitet, er å nytte ein marknadsretta metode og følgjeleg velje ut leverandørar på eit konkurransemessig grunnlag i ein situasjon med fleire tenesteytarar, samstundes som den driftsmessige og finansielle berekrafta til tiltaka vert sikra dersom det trengst.
- 26) Det bør utviklast felleseuropeiske elektroniske offentlege tenester innanfor ramma av spesifikke prosjekt av felles interesse og spesifikke tverrgående tiltak. Andre tverrgående tiltak bør setjast i verk for å støtte den samverkande ytinga av desse tenestene ved at det vert skipa eller utvikla infrastrukturtenester.

<sup>(1)</sup> TEF L 281 av 23.11.1995, s. 31. Direktivet endra ved forordning (EF) nr. 1882/2003 (TEU L 284 av 31.10.2003, s. 1).

<sup>(2)</sup> TEF L 201 av 31.7.2002, s. 37.

- 27) Følgjeleg bør IDABC-programmet òg vere ope for deltaking for statane i Det europeiske økonomiske samarbeidsområdet og for kandidatstatane, og det bør oppmodast til samarbeid med andre tredjestatar. Internasjonale organ kan ta del for eiga rekning i gjennomføringa av prosjekt av felles interesse og tverrgåande tiltak.
- 28) Med sikte på å sikre ei god forvaltning av dei finansielle ressursane til Den europeiske unionen og unngå unauddisynleg auke i utstyrsmengd, overflødige granskningar og bruk av ulike metodar, bør det vere mogleg å nytte tenester som er utvikla under IDA-programmet eller IDABC-programmet innanfor ramma av den felles utanriks- og tryggleikspolitikken og politi- og justissamarbeidet i kriminalsaker, i samsvar med avsnitt V og VI i traktaten om Den europeiske unionen.
- 29) Ettersom målet for skipinga av felleseuropeiske elektroniske offentlege tenester ikkje kan nåast i tilstrekkeleg grad av medlemsstatane, og difor på grunn av omfanget og verknadene av det framlagde tiltaket betre kan nåast på fellesskapsplan, kan Fellesskapet vedta tiltak i samsvar med nærleiksprinsippet slik det er fastsett i artikkel 5 i traktaten. I samsvar med prinsippet om rimeleg samhøve, slik det er fastsett i den nemnde artikkelen, går ikkje denne avgjerda lenger enn det som er naudsynt for å nå dette målet.
- 30) Dei tiltaka som er naudsynte for å gjennomføre denne avgjerda, bør vedtakast i samsvar med rådsbeslutning 1999/468/EF av 28. juni 1999 om fastsettelse av nærmere regler for utøvelsen av den gjennomføringsmyndighet som er tillagt Kommisjonen<sup>(1)</sup>.
- 31) I denne avgjerda er det for heile det tidsrommet som programmet varer, fastsett ei finansiell ramme som utgjer det viktigaste referansegrunnlaget for budsjettstyresmakta ved den årlege budsjetthandsaminga, slik det er definert i nr. 33 i den tverrinstitusjonelle avtala av 6. mai 1999 mellom Europaparlamentet, Rådet og Kommisjonen om budsjett disiplin og betre budsjett handsaming<sup>(2)</sup> —

TEKE DENNE AVGJERDA:

#### Artikkel 1

##### Verkeområde

Ved denne avgjerda vert det for tidsrommet 2005-2009 skipa eit program for samverkande yting av felleseuropeiske elektroniske offentlege tenester til europeiske offentlege forvaltningar, fellesskapsorgan og andre organ og til europeiske føretak og borgarar (heretter kalla «IDABC-programmet»).

#### Artikkel 2

##### Mål

1. Målet for IDABC-programmet er å identifisere, støtte og fremje utviklinga og skipinga av felleseuropeiske elektroniske

offentlege tenester og underliggjande transeuropeiske telematikknett, og å hjelpe medlemsstatane og Fellesskapet på dei høvesvise ansvarsområda deira med å gjennomføre fellesskapspolitikk og verksemd, for såleis å oppnå vesentlege føremoner for offentlege forvaltningar, føretak og borgarar.

2. Programmet tek òg sikte på å:

- gjere det mogleg å utveksle informasjon på ein fullgod, effektiv og sikker måte mellom offentlege forvaltningar på alle relevante plan, og mellom slike forvaltningar og fellesskapsorgan eller eventuelt andre organ,
- utvide føremonene med utveksling av informasjon, slik det er nemnt i bokstav a), med sikte på å lette ytinga av tenester til føretak og borgarar, samstundes som det vert teke omsyn til behova deira,
- støtte avgjerdestakingsprosessen i Fellesskapet og lette kommunikasjonen mellom fellesskapsorgana ved å utvikle ein tilsvarende strategi på felleseuropeisk plan,
- oppnå samverknadsevne både innanfor og på tvers av ulike politikkområde, og eventuelt med føretak og borgarar, særleg på grunnlag av ei europeisk ramme for samverknadsevne,
- medverke til den innsatsen som vert gjord av dei offentlege forvaltningane i medlemsstatane og Fellesskapet med omsyn til rasjonalisering av drifta, snøggare gjennomføring, tryggleik, effektivitet, klarleik, servicekultur og skjønsamd,
- fremje spreinga av god praksis og oppmuntre til utvikling av nyskapande telematikklysingar i offentlege forvaltningar.

#### Artikkel 3

##### Definisjonar

I denne avgjerda tyder:

- «telematikknett» eit omfattande datakommunikasjons-system som femner om fysisk infrastruktur og koplingar og om dei tilhøyrande tenestene og brukarprogramma, og som såleis gjer det mogleg med elektronisk informasjonsutveksling mellom og innanfor offentlege forvaltningar og mellom offentlege forvaltningar og føretak og borgarar,
- «felleseuropeiske elektroniske offentlege tenester» grensekryssande informasjon og interaktive tenester i offentleg sektor, anten sektorvise eller tverrgåande, dvs. på tvers av sektorane, som vert ytt av europeiske offentlege forvaltningar til europeiske offentlege forvaltningar, føretak og interesseorganisasjonane deira og borgarar og interesseorganisasjonane deira, ved hjelp av samverkande transeuropeiske telematikknett,
- «prosjekt av felles interesse» prosjekt på dei politikkområda som det er gjort greie for i vedlegg I, som er sette i verk eller vidareførde i medhald av denne avgjerda og som gjeld skiping eller betring av felleseuropeiske elektroniske offentlege tenester,

<sup>(1)</sup> TEF L 184 av 17.7.1999, s. 23.

<sup>(2)</sup> TEF C 172 av 18.6.1999, s. 1. Avtala endra ved europaparlaments- og rådsavgjerd 2003/429/EF (TEU L 147 av 14.6.2003, s. 25).

- d) «infrastrukturtenester» tenester som vert ytte for å stette allmenne krav som omfattar teknologi- og programvareløysingar, medrekna ei ramme for europeisk samverknad, tryggleik, mellomvare og nettenester. Infrastrukturtenester skal støtte ytinga av felleseuropeiske elektroniske offentlege tenester,
- e) «tverrgåande tiltak» eit tiltak slik det er gjort greie for i vedlegg II, som er sett i verk eller vidareført i medhald av denne avgjerda, og som gjeld skiping eller betring av tverrgåande felleseuropeiske elektroniske offentlege tenester, infrastrukturtenester eller strategi- og støtteverksemd,
- f) «samverknadsevne» den evna som informasjons- og kommunikasjonsteknologisystem (IKT-system) og den forretningsverksemda som dei støttar, har til å utveksle data og gjere det mogleg å dele informasjon og kunnskap.

#### Artikkel 4

##### Prosjekt av felles interesse

For å nå dei måla som er fastsette i artikkel 2, skal Fellesskapet, i samarbeid med medlemsstatane, gjennomføre prosjekt av felles interesse som det er gjort greie for i det samanhengande arbeidsprogrammet som er nemnt i artikkel 8 nr. 1, i samsvar med dei prinsippa som er fastsette i artikkel 6 og 7.

Når det er mogleg, skal prosjekt av felles interesse nytte dei tverrgåande felleseuropeiske elektroniske offentlege tenestene og infrastrukturtenestene, og medverke til å vidareutvikle desse tenestene.

#### Artikkel 5

##### Tverrgåande tiltak

1. For å nå dei måla som er fastsette i artikkel 2, og for å støtte prosjekt av felles interesse, skal Fellesskapet i samarbeid med medlemsstatane gjennomføre dei tverrgåande tiltaka som er nemnde i vedlegg II og gjort greie for i det samanhengande arbeidsprogrammet som er nemnt i artikkel 8 nr. 1, i samsvar med dei prinsippa som er fastsette i artikkel 6 og 7.

2. Dei tverrgåande tiltaka skal gå ut på å yte, halde ved lag og fremje infrastrukturtenester for offentlege forvaltningar i Fellesskapet på grunnlag av den vedlikehalds- og tilgangspolitikken som er definert innanfor ramma av IDABC-programmet. Dei skal òg sikre forvaltninga av tverrgåande felleseuropeiske elektroniske offentlege tenester, i tillegg til å skipe strategi- og støtteverksemd for å fremje felleseuropeiske elektroniske offentlege tenester, utarbeide strategiske analysar av relevant utvikling i Fellesskapet og i medlemsstatane og sikre forvaltninga av programmet og spreinga av god praksis.

3. For å kunne fastsetje kva tverrgåande tiltak som skal setjast i verk, skal Fellesskapet utarbeide ei oversikt over dei tverrgåande felleseuropeiske elektroniske offentlege tenestene og infrastrukturtenestene. Denne oversikta skal omfatte aspekt som t.d. den forvaltninga, organiseringa, det tilhøyrande ansvaret og kostnadsdelinga som er naudsynt, og den strategien som skal nyttast i utviklinga og gjennomføringa av dei felleseuropeiske elektroniske offentlege tenestene og infrastrukturtenestene. Strategien skal byggje på ei vurdering av prosjektkrava. Oversikta skal vurderast på nytt kvart år.

#### Artikkel 6

##### Gjennomføringsprinsipp

1. Prosjekt av felles interesse og tverrgåande tiltak skal gjennomførast i samsvar med dei prinsippa som er fastsette i nr. 2-10.

2. Denne avgjerda er det rettslege grunnlaget for gjennomføringa av tverrgåande tiltak.

3. Gjennomføringa av eit prosjekt krev eit sektorspesifikt rettsleg grunnlag. For føremålet med denne avgjerda skal eit prosjekt reknast for å ha stetta dette kravet når det støttar ytinga av tverrgåande felleseuropeiske elektroniske offentlege tenester til offentlege forvaltningar, føretak eller borgarar innanfor ramma av gjennomføringa av eit sektorspesifikt rettsleg grunnlag eller eit anna relevant rettsleg grunnlag.

Dette nummeret skal ikkje nyttast på prosjekt av felles interesse som støttar ytinga av elektroniske offentlege tenester mellom fellesskapsorgan og europeiske kontor.

4. Det skal oppmuntrast til at så mange som mogleg av medlemsstatane tek del i prosjekt til støtte for felleseuropeiske elektroniske offentlege tenester som vert ytte av offentlege forvaltningar til føretak og interesseorganisasjonane deira eller til borgarar og interesseorganisasjonane deira.

5. Prosjekt av felles interesse og tverrgåande tiltak skal omfatte alle tiltak som er naudsynt for skiping eller betring av felleseuropeiske elektroniske offentlege tenester.

6. Når det høver, skal prosjekt av felles interesse og tverrgåande tiltak omfatte ein innleiande fase. Dei skal omfatte ein føregranskingsfase, ein utviklings- og valideringsfase og ein gjennomføringsfase som skal gjennomførast i samsvar med artikkel 7.

Dette nummeret skal ikkje nyttast på strategi- og støtteverksemd slik det er gjort greie for i del C i vedlegg II.

7. Når det høver, skal det takast omsyn til resultat som er oppnådde gjennom anna verksemd i Fellesskapet og i medlemsstatane, særleg fellesskapsprogramma for forskning og teknologisk utvikling og andre fellesskapsprogram og -strategiar, som t.d. eTEN<sup>(1)</sup>, e-innhald<sup>(2)</sup>, e-integrasjon, e-læring<sup>(3)</sup> og MODINIS<sup>(4)</sup> når prosjekt av felles interesse og tverrgåande tiltak skal fastleggjast, slik at overlapping kan unngåast og framdrifta i utviklinga av elektroniske offentlege tenester kan aukast. Det skal òg takast omsyn til prosjekt i planleggings- eller utviklingsfasen.

8. For prosjekt av felles interesse eller tverrgåande tiltak skal det utarbeidast tekniske spesifikasjonar med tilvising til europeiske standardar eller offentleg tilgjengelege spesifikasjonar, eller til opne spesifikasjonar for informasjonsutveksling og integrering av tenester, og dei skal eventuelt vere i samsvar med infrastrukturtenestene for såleis å sikre samverknadsevna og tilgjenget mellom nasjonale system og fellesskapsystem innanfor og mellom forvaltingssektorar og med føretak og borgarar.

9. Når det høver, skal prosjekt av felles interesse eller tverrgåande tiltak ta tilbørleg omsyn til den ramma for europeisk samverknad som vert innført, halden ved lag og fremja ved IDABC-programmet.

<sup>(1)</sup> TEF L 183 av 11.7.1997, s. 12.

<sup>(2)</sup> TEF L 14 av 18.1.2001, s. 32.

<sup>(3)</sup> TEU L 345 av 31.12.2003, s. 9.

<sup>(4)</sup> TEU L 336 av 23.12.2003, s. 1.

10. Alle prosjekt av felles interesse eller tverrgående tiltak skal gjennomgå ei sluttvurdering innan eitt år etter at gjennomføringsfasen er slutt.

Vurderinga skal omfatte ein nytte- og kostnadsanalyse.

Når det gjeld prosjekt av felles interesse, skal vurderinga utførast i samarbeid med medlemsstatane i samsvar med dei reglane som gjeld for sektorpolitikken, og ho skal leggjast fram for det relevante sektorutvalet.

Konklusjonane og tilrådingane frå vurderinga av prosjekta av felles interesse skal leggjast fram for det utvalet som er nemnt i artikkel 11 nr. 1 til orientering.

Når det gjeld tverrgående tiltak, skal vurderinga utførast innanfor ramma av det utvalet som er nemnt i artikkel 11 nr. 1.

#### Artikkel 7

##### Tilleggsprinsipp

1. I tillegg til dei prinsippa som er fastsette i artikkel 6, skal dei prinsippa som er fastsette i nr. 2-8, nyttast.

2. Under den innleiande fasen skal det utarbeidast ein innleiande rapport om måla, verkeområdet og grunngevinga for prosjektet av felles interesse eller det tverrgående tiltaket, og særleg om forventa kostnader og nytte, i tillegg til at det skal arbeidast for å sikre at deltakarane etter tilbørleg samråd får den naudsynte forståinga og interessa for prosjektet, medrekna opplysningar om kva utval som er det rette til å følgje opp gjennomføringa av prosjektet eller tiltaket.

3. Under føregranskingsfasen skal det utarbeidast ein overordna gjennomføringsplan som skal omfatte utviklings- og gjennomføringsfasen og innehalde informasjonen i den innleiande rapporten, i tillegg til:

- a) ei oversikt over den planlagde organisatoriske utviklinga og eventuelt omlegginga av arbeidsmetodar,
- b) mål, funksjonar, deltakarar og teknisk metode,
- c) tiltak for å lette fleispråkleg kommunikasjon,
- d) tiltak for å sikre trygging og vern av opplysningar,
- e) rollefordelinga mellom Fellesskapet og medlemsstatane,
- f) ei fordeling av dei forventa kostnadene og ei oversikt over dei forventa føremonene, medrekna kriterier for vurdering av desse føremonene etter gjennomføringsfasen og ein detaljert analyse av kapitalforrentinga i tillegg til dei delmåla som skal nåast,
- g) eit skjema der det er fastlagt ei rimeleg fordeling mellom Fellesskapet og medlemsstatane og eventuelt andre organ, av drifts- og vedlikehaldskostnadene for dei tverrgående felleseuropeiske elektroniske offentlege tenestene og infrastrukturtenestene etter at gjennomføringsfasen er over.

4. Under utviklings- og valideringsfasen kan den løysinga som er lagd fram, eventuelt utarbeidast, prøvast, vurderast og overvakast i ein mindre målestokk, og resultatane nyttast til å tilpasse den overordna gjennomføringsplanen tilsvarende.

5. Under gjennomføringsfasen skal dei aktuelle tenestene skipast og kome i full drift i samsvar med den overordna gjennomføringsplanen.

6. Den innleiande rapporten og den overordna gjennomføringsplanen skal skipast ved å nytte metodar som er utarbeidde som støtteverksemd innanfor ramma av IDABC-programmet.

7. Igangsetjinga og gjennomføringa av eit prosjekt av felles interesse, fastlegginga av fasane og utarbeidinga av innleiande rapportar og overordna gjennomføringsplanar skal utførast og kontrollerast av Kommisjonen, som handlar i samsvar med den relevante framgangsmåten for sektorutval.

Dersom det ikkje kan nyttast nokon framgangsmåte for sektorutval, skal Fellesskapet og medlemsstatane oppnemne sektorgrupper av sakkunnige som skal vurdere alle relevante spørsmål.

Kommisjonen skal sende konklusjonane frå sektorutvala og eventuelt frå gruppene av sakkunnige til det utvalet som er nemnt i artikkel 11 nr. 1.

8. Kommisjonen skal setje i gang og gjennomføre eit tverrgående prosjekt, definere fasane og utarbeide og kontrollere innleiande rapportar og overordna gjennomføringsplanar, i samsvar med den framgangsmåten som er nemnd i artikkel 11 nr. 2.

#### Artikkel 8

##### Framgangsmåte for gjennomføring

1. Kommisjonen skal skipe eit samanhengande arbeidsprogram for heile det tidsrommet som denne avgjerda gjeld, for gjennomføring av prosjekt av felles interesse og tverrgående tiltak. Kommisjonen skal godkjenne arbeidsprogrammet og minst éin gong i året eventuelle endringar av det, og om naudsynt ta omsyn til budsjettfordelinga for kvart prosjekt av felles interesse og for kvart tverrgående tiltak.

Den framgangsmåten som er nemnd i artikkel 11 nr. 2, skal nyttast når det gjeld godkjenninga til Kommisjonen av det samanhengande arbeidsprogrammet og alle endringar av dette.

2. For kvart prosjekt av felles interesse og kvart tverrgående tiltak skal det arbeidsprogrammet som er nemnt i nr. 1, eventuelt omfatte:

- a) ei utgreiing av måla, verkeområdet, grunngevinga, dei moglege deltakarane, funksjonane og den tekniske metoden,
- b) ei fordeling av tidlegare utgifter og delmål som er nådde, i tillegg til forventa kostnader og nytte og delmål som skal nåast,
- c) ein spesifisering av dei tverrgående felleseuropeiske elektroniske offentlege tenestene og infrastrukturtenestene som skal nyttast.

#### Artikkel 9

##### Budsjettføresegner

1. Utan at det rører ved artikkel 8 skal den framgangsmåten som er nemnd i artikkel 11 nr. 2, nyttast på godkjenninga til Kommisjonen av budsjettet for kvart prosjekt av felles interesse eller eventuelt for kvart tverrgående tiltak, slik at det, med atterhald for gjeldande budsjettreglar, dekkjer det samanhengande arbeidsprogrammet og eventuelle endringar av dette, i samsvar med artikkel 8 nr. 1.

2. Midlane skal tildelast når spesifikke delmål er nådde i samsvar med den framgangsmåten som skal nyttast på det relevante sektorutvalet for prosjekt av felles interesse, og på det utvalet som er nemnt i artikkel 11 nr. 1, for tverrgåande tiltak. For igangsetjinga av den innleiande fasen skal delmålet vere at prosjektet av felles interesse eller det tverrgåande tiltaket vert teke inn i det samanhengande arbeidsprogrammet. For innleiinga av føregranskingsfasen skal delmålet vere den innleiande rapporten. For innleiinga av den påfølgjande utviklings- og valideringsfasen skal delmålet vere den overordna gjennomføringsplanen. Delmål som skal nåast under utviklings-, validerings- og gjennomføringsfasen skal takast inn i det samanhengande arbeidsprogrammet i samsvar med artikkel 8.

3. Framgangsmåten som er nemnd i artikkel 11 nr. 2, skal òg nyttast på eventuelle framlegg om budsjettauke på meir enn 100 000 euro for kvart prosjekt av felles interesse eller for kvart tverrgåande tiltak gjennom eit år.

4. Programmet skal gjennomførast på grunnlag av reglane for offentleg innkjøp. Dersom kontrakten er verd meir enn 500 000 euro, skal dei tekniske spesifikasjonane for tilbodsinnbydingar fastleggjast i samordning med medlemsstatane innanfor ramma av det relevante sektorutvalet eller det utvalet som er nemnt i artikkel 11 nr. 1.

#### Artikkel 10

##### Finansielt tilskot frå Fellesskapet

1. Ved gjennomføringa av prosjekt av felles interesse og tverrgåande tiltak skal Fellesskapet bere kostnadene i høve til sine egne interesser i prosjekta.

2. Det finansielle tilskotet frå Fellesskapet skal fastsetjast for kvart prosjekt av felles interesse og kvart tverrgåande tiltak i samsvar med nr. 3-7.

3. For at eit prosjekt av felles interesse eller eit tverrgåande tiltak skal kunne få eit finansielt tilskot frå Fellesskapet, skal det leggjast fram konkrete planar for finansiering av vedlikehalds- og driftskostnadene etter gjennomføringsfasen, der rollefordelinga mellom Fellesskapet og medlemsstatane eller andre organ går tydeleg fram.

4. Under den innleiande fasen og føregranskingsfasen kan tilskotet frå Fellesskapet dekkje alle kostnadene til dei naudsynte granskningane.

5. Under utviklings- og valideringsfasen og gjennomføringsfasen skal Fellesskapet bere kostnadene i samband med dei oppgåvene som det har fått tildelt innanfor ramma av den overordna gjennomføringsplanen for det aktuelle prosjektet av felles interesse eller det aktuelle tverrgåande tiltaket.

6. Når det gjeld yting og vedlikehald av infrastrukturtenester, skal fellesskapsfinansieringa av eit prosjekt av felles interesse eller eit tverrgåande tiltak i prinsippet falle bort etter eit tidsrom på høgst fire år rekna frå starten av den innleiande fasen.

7. Dei finansielle midlane som er fastsette i medhald av denne avgjerda, kan ikkje tildelast prosjekt av felles interesse eller tverrgåande tiltak eller fasar av prosjekt av felles interesse eller tverrgåande tiltak som mottok andre former for fellesskapsfinansiering.

8. Innan 31. desember 2006 skal ordningar som sikrar den finansielle og driftsmessige berekrafta til infrastrukturtenestene, dersom det er naudsynt, definerast og fastsetjast i samsvar med den framgangsmåten som er nemnd i artikkel 11 nr. 2.

#### Artikkel 11

##### Utval

1. Kommisjonen skal få hjelp av eit utval kalla Utvalet for felleseuropeiske elektroniske offentlege tenester (PEGSCO).

2. Når det vert vist til dette nummeret, skal artikkel 4 og 7 i rådsavgjerd 1999/468/EF nyttast, samstundes som det vert teke omsyn til artikkel 8 i den nemnde avgjerda.

Det tidsrommet som er fastsett i artikkel 4 nr. 3 i avgjerd 1999/468/EF, skal vere tre månader.

3. PEGSCO fastset møtetreffene sine.

#### Artikkel 12

##### Årsrapport

Kommisjonen skal kvart år leggje fram for PEGSCO ein rapport om gjennomføringa av denne avgjerda.

#### Artikkel 13

##### Vurdering

1. Når programmet er avslutta, skal Kommisjonen i samordning med medlemsstatane gjere ei sluttvurdering av gjennomføringa av denne avgjerda.

2. Dessutan skal Kommisjonen innan midten av 2006 og i samordning med medlemsstatane, gjere ei vurdering av gjennomføringa av denne avgjerda. I denne vurderinga skal det mellom anna òg sjåast på kor effektiv og verknadsfull IDABC-verksemda er, i tillegg til at det skal gjerast ei kvalitativ og kvantitativ vurdering av resultatane sett i høve til arbeidsprogrammet. I samband med denne vurderinga skal Kommisjonen rapportere om korleis summen for 2007-2009 stemmer overeins med dei nye finansielle overslaga. Kommisjonen skal eventuelt gjere dei tiltaka som er naudsynte innanfor ramma av budsjetthandsaminga for 2007-2009, for å sikre at dei årlege løyvingane stemmer overeins med dei finansielle overslaga.

3. I vurderingane skal det slåast fast kva framsteg som er gjorde med omsyn til dei prosjekta av felles interesse og dei tverrgåande tiltaka som er førde opp i høvesvis vedlegg I og II, og særleg korleis dei planlagde felleseuropeiske elektroniske offentlege tenestene vert utvikla, gjennomførde og nytta.

I lys av dei utgiftene som Fellesskapet har hatt, skal vurderingane òg omfatte ei gransking av dei føremonene som dei felleseuropeiske elektroniske offentlege tenestene og infrastrukturtenestene har tilført Fellesskapet, offentlege forvaltningar, føretak og borgar med omsyn til utviklinga av ein felles politikk og institusjonelt samarbeid, i tillegg til ei fastlegging av område der det kan gjerast betringar og ei vurdering av overføringsverdien i høve til anna fellesskapsverksemd på området felleseuropeiske elektroniske offentlege tenester og infrastrukturtenester.

4. Kommisjonen skal sende over til Europaparlamentet og Rådet resultatane frå dei kvalitative og kvantitative vurderingane sine, saman med eventuelle høvelege framlegg til endring av denne avgjerda. Resultatane skal sendast over før utkastet til det allmenne budsjettet til Den europeiske unionen for høvesvis 2007 og 2010 vert lagt fram.

*Artikkel 14***Internasjonalt samarbeid**

1. Statane i Det europeiske økonomiske samarbeidsområdet og kandidatstatane kan ta del i IDABC-programmet innanfor ramma av dei høvesvise avtalene som dei har med Det europeiske fellesskapet.
2. Det skal oppmuntrast til samarbeid med andre tredjestatar når det gjeld gjennomføringa av prosjekt av felles interesse og tverrgåande tiltak, særleg med offentlege forvaltningar i middelhavsstatane og i statane på Balkan og i Aust-Europa. Det skal òg leggjast særleg vekt på internasjonalt samarbeid til støtte for utvikling og økonomisk samarbeid. Kostnadene til dette skal ikkje dekkjast av IDABC-programmet.
3. Internasjonale organisasjonar eller andre internasjonale organ kan ta del for eiga rekning i gjennomføringa av prosjekt av felles interesse og tverrgåande tiltak.

*Artikkel 15***Andre nett**

1. Med omsyn til skiping eller betring av andre nett som ikkje er prosjekt av felles interesse eller tverrgåande tiltak (heretter kalla «andre nett»), skal medlemsstatane og Fellesskapet, i samsvar med dei relevante føresegnene i regelverket til Fellesskapet om skipinga av desse netta, syte for at nr. 2-5 vert stetta.
2. Med atterhald for nr. 3 kan dei tverrgåande felleseuropeiske elektroniske offentlege tenestene og infrastrukturtenestene som vert ytte av Fellesskapet innanfor ramma av denne avgjerda, verte nytta av andre nett.
3. For kvart av dei andre netta skal det utarbeidast tekniske spesifikasjonar med tilvising til høvesvis europeiske standardar eller offentleg tilgjengelege spesifikasjonar eller opne spesifikasjonar for informasjonsutveksling og integrering av tenester, for såleis å sikre samverknadsevna mellom nasjonale system og fellesskapssystem innanfor og mellom forvaltingssektorar og med føretak og borgarar.
4. Innan 31. oktober 2005 og deretter kvart år skal Kommisjonen leggje fram for PEGSCO ein rapport om gjennomføringa av nr. 1-5. I denne rapporten skal Kommisjonen opplyse om alle relevante brukarkrav eller eventuelle andre grunnar som hindrar andre nett i å dra nytte av dei tenestene

som er nemnde i nr. 2, og drøfte om det er mogleg å tilpasse desse tenestene slik at bruken av dei kan utvidast.

5. Dei felleseuropeiske elektroniske offentlege tenestene og infrastrukturtenestene som er utvikla innanfor ramma av Fellesskapet i samband med IDA- eller IDABC-programmet, kan nyttast av Rådet med omsyn til skiping eller utvikling av verkeemd innanfor ramma av den felles utanriks- og tryggleikspolitikken og politi- og justissamarbeidet i kriminalsaker, i samsvar med avsnitt V og VI i traktaten om Den europeiske unionen.

Bruken av slike tenester skal avgjerast og finansierast i samsvar med avsnitt V og VI i den nemnde traktaten.

*Artikkel 16***Finansiell ramme**

1. Den finansielle ramma for gjennomføringa av fellesskapstiltaket i medhald av denne avgjerda for tidsrommet 1. januar 2005-31. desember 2009 vert med dette fastsett til 148,7 millionar euro, der 59,1 millionar euro skal dekkje tidsrommet fram til 31. desember 2006.

For tidsrommet etter 31. desember 2006 skal denne summen reknast som stadfesta dersom han for denne fasen stemmer overeins med dei finansielle overslaga som gjeld for det tidsrommet som tek til i 2007.

2. Dei årlege løyvingane for tidsrommet 2005-2009 skal godkjennast av budsjettstyresmakta innanfor ramma av dei finansielle overslaga.

*Artikkel 17***Iverksetjing**

Denne avgjerda tek til å gjelde 20. dagen etter at ho er kunnngjord i *Tidend for Den europeiske unionen*.

Ho skal nyttast frå 1. januar 2005 til 31. desember 2009.

Utferda i Strasbourg, 21. april 2004.

*For Europaparlamentet*

P. COX

*President*

*For Rådet*

D. ROCHE

*Formann*

## VEDLEGG I

**POLITIKKOMRÅDE FOR PROSJEKT AV FELLES INTERESSE**

Prosjekt av felles interesse innanfor ramma av IDABC-programmet er prosjekt som er skipa særleg på følgjande område:

## A. ALLMENT

1. Fellesskapspolitikk og –verksemd (i samsvar med del B), informasjonsutveksling mellom organa (i samsvar med del C), internasjonalt samarbeid (i samsvar med del D) og andre nett (i samsvar med del E).
2. Tiltak som krevst for at europeiske kontor og institusjonar skal fungere, og som er til støtte for den rettslege ramma for skipinga av desse europeiske kontora.
3. Politikk i samband med fri rørsle for personar, særleg til støtte for yting av jamgode tenester til borgarar og føretak i dei ulike medlemsstatane.
4. Tiltak som innanfor ramma av fellesskapspolitikk og -verksemd og under uventa omstende er tvingande naudsynte for å støtte tiltaka til Fellesskapet og medlemsstatane.

## B. fellesskapspolitikk og -verksemd

1. Økonomisk og monetær politikk.
2. Konsolidering av «den gjeldande fellesskapsretten» etter utvidinga av Den europeiske unionen.
3. Regions- og utjamningspolitikk, særleg for å lette innsamlinga, forvaltinga og spreinga av opplysningar om gjennomføringa av regions- og utjamningspolitikken på sentralt og regionalt offentleg forvaltingsplan.
4. Fellesskapsfinansiering, særleg for å skape eit grensesnitt til eksisterande databasar i Kommisjonen med sikte på å lette tilgangen for europeiske organisasjonar, særleg små og mellomstore føretak, til finansieringskjelder i Fellesskapet.
5. Statistikk, særleg innsamling og spreieing av statistiske opplysningar, i tillegg til statistikk til støtte for elektronisk offentleg forvaltning med sikte på å vurdere samverknadsevna mellom system og effektiviteten deira, og dermed måle kor vellukka dei er.
6. Offentleggjering av offisielle dokument og forvaltning av offisielle informasjonstenester.
7. Landbruks- og fiskerisektorane, særleg med omsyn til forvaltning av marknader for landbruksvarer og landbruksstrukturar, meir effektiv økonomistyring, utveksling av rekneskapsdata for driftseiningar i landbruket (RICA) mellom nasjonale organ og Kommisjonen, og motkjemping av svik.
8. Industri- og tenestesektoren, særleg med omsyn til informasjonsutveksling mellom offentlege forvaltningar som handsamar konkurransesaker mellom føretak, og mellom slike offentlege forvaltningar og samanslutningar av føretak.
9. Konkurranspolitikk, særleg med omsyn til gjennomføring av betre elektronisk datautveksling med dei nasjonale forvaltningane med sikte på å lette informasjons- og samrådsordningane.
10. Utdanning, kultur og det audiovisuelle området, særleg med omsyn til informasjonsutveksling som gjeld innhald på opne nett, for å fremje utvikling og fri omsetnad av nye audiovisuelle tenester og informasjonstenester.
11. Transportsektoren, særleg til støtte for datautveksling om førarar, køyretøy og transportørar.
12. Turisme, miljø, forbrukarvern, folkehelse og offentleg innkjøp.
13. Forskingspolitikk, særleg for å lette innsamlinga, forvaltinga og spreinga av opplysningar om gjennomføringa av ein samordna forskingspolitikk på nasjonalt plan innanfor offentleg forvaltning.
14. Medverking til at måla for e-Europa-initiativet og den tilhøyrande handlingsplanen vert nådde, særleg kapittelet om elektronisk offentleg forvaltning og tryggleik, som er meint å vere til nytte for føretak og borgarar.
15. Innvandringspolitikk, særleg med omsyn til gjennomføring av betre elektronisk datautveksling med dei nasjonale offentlege forvaltningane for å lette informasjons- og samrådsordningane.

16. Samarbeid mellom rettsstyresmaktene.
17. Informasjonssystem som gjer det mogleg for nasjonale parlament og det sivile samfunnet å ta del i lovgjevingsprosessen.
18. Oppfølging av gjennomføringa av fellesskapsregelverket i medlemsstatane og utveksling av informasjon mellom medlemsstatane og fellesskapsorgana.

#### C. INFORMASJONSUTVEKSLING MELLOM ORGANA

Utveksling av informasjon mellom organa, særleg:

1. til støtte for framgangsmåten for avgjerdstaking i Fellesskapet og spørsmål frå Parlamentet,
2. for å innføre det telematikk sambandet som er naudsynt mellom Kommissjonen, Europaparlamentet, Rådet (medrekna nettstaden til det sitjande formannskapet i Den europeiske unionen, dei faste representasjonane til medlemsstatane og samarbeidande nasjonale departement) og andre fellesskapsorgan,
3. for å fremje fleirspråksbruken i informasjonsutvekslinga mellom organa, betre styring av omsetjingsprosessen og bruk av støtteverktøy for omsetjing, utvikling og deling av fleirspråklege ressursar og tilrettelegging av felles tilgang til slike kjelder,
4. utveksling av dokument mellom europeiske kontor og organ og fellesskapsorgana.

#### D. INTERNASJONALT SAMARBEID

Utviding av prosjekt av felles interesse til tredjestatar, medrekna kandidatstatar, og til internasjonale organisasjonar, med særleg vekt på initiativ for utvikling og økonomisk samarbeid.

#### E. ANDRE NETT

Prosjekt av felles interesse som før vart finansierte gjennom IDA-programmet, og som no har si eiga fellesskapsfinansiering, kjem inn under gruppa «andre nett», som er nemnd i artikkel 14 i denne avgjerda.

---

## VEDLEGG II

## TVERRGÅANDE TILTAK

Tverrgående tiltak innanfor ramma av IDABC-programmet er særleg:

## A. TVERRGÅANDE FELLESEUROPEISKE ELEKTRONISKE OFFENTLEGE TENESTER

Tverrgående tiltak som er sette i verk for å innleie, mogleggjere og forvalte ytinga av tverrgående felleseuropeiske elektroniske offentlege tenester, medrekna organisasjon og samarbeid, som t.d.:

- a) ein portal som skal gje føretak og borgarar tilgang til felleseuropeiske fleirspråklege direktekopla opplysningar og interaktive tenester,
- b) eit felles tilgangspunkt til t.d. direktekopla rettslege informasjonstenester i medlemsstatane,
- c) eit interaktivt program for innsamling av synspunkta og røynselene til aktørar med omsyn til spørsmål av allmenn interesse og om korleis felleseuropeisk politikken verkar.

## B. INFRASTRUKTURTENESTER

Tverrgående tiltak som er sette i verk for å yte og halde ved lag teknologi- og programvareløysingar med funksjonar som er særleg knytte til IKT, frå kommunikasjon til definerte standardar. Teknologi- og programvareløysingar omfattar nettenester, mellomvare, tryggleik og retningslinjer, som t.d.:

- a) ei sikker og påliteleg kommunikasjonsplattform for utveksling av data mellom offentlege forvaltningar,
- b) eit sikkert og påliteleg system for forvaltning av datastraumar som er kopla saman med ulike arbeidsprosessar,
- c) eit felles verktøysett til forvaltning av fleirspråklege samarbeidande nettstader og portalar,
- d) akkreditering av plattformer med sikte på handsaming av fortrulege opplysningar,
- e) skiping og gjennomføring av ein autentiseringspolitikk for nett og prosjekt av felles interesse,
- f) tryggleiksgranskningar og risikoanalysar til støtte for nett eller andre infrastrukturtenester,
- g) ordningar for å skape tillit mellom klassifiseringsstyresmakter, slik at elektroniske sertifikat kan nyttast i felleseuropeiske elektroniske offentlege tenester,
- h) tenester som gjeld identifisering, godkjenning, autentisering og ikkje-nekting i samband med prosjekt av felles interesse,
- i) ei felles ramme for deling og utveksling av informasjon og kunnskap mellom europeiske offentlege forvaltningar og med føretak og borgarar, medrekna retningslinjer for arkitekturen,
- j) spesifikasjon av XML-vokabular, XML-skjema og XML-produkt til støtte for utveksling av data i nett,
- k) funksjonelle og ikkje-funksjonelle standardkrav med omsyn til handtering av elektroniske register i offentlege forvaltningar,
- l) ei metadata-ramme for informasjon frå offentleg sektor i felleseuropeiske brukarprogram,
- m) jamføring av standardar for open utveksling med sikte på fastsetjing av ein politikk for opne format,
- n) felles spesifikasjonar og infrastrukturtenester for å lette elektronisk handel i heile Europa,
- o) system for maskinomsetjing og andre fleirspråklege verktøy, medrekna ordbøker, tesaurusar og klassifiseringssystem til støtte for fleirspråksbruk,

- p) brukarprogram til støtte for samarbeid mellom offentlege forvaltingar,
- q) brukarprogram til støtte for tilgang til tenester gjennom fleire kanalar,
- r) programvareverktøy med open kjeldekode og tiltak for å lette utvekslinga av røynsler mellom offentlege forvaltingar og bruken deira av løysingar.

### C. STRATEGI- OG STØTTEVERKSEMD

1. Strategiverksemd til støtte for vurdering og fremjing av felleseuropeiske elektroniske offentlege tenester, som t.d.:
    - a) analyse av strategiar for elektronisk offentleg forvaltning og informasjonsstyring i heile Europa,
    - b) tilskiping av haldningsskapande arrangement med deltaking frå dei aktørane som det gjeld,
    - c) fremjing av skipinga av felleseuropeiske elektroniske offentlege tenester med særleg vekt på tenester til føretak og borgarar.
  2. Støtteverksemd til støtte for programforvaltinga med sikte på å overvake og betre effektiviteten til og verknadene av programmet, som t.d.:
    - a) kvalitetstrygging og -kontroll for betre å kunne fastsetje måla for og gjennomføringa og resultatata av prosjektet,
    - b) programvurdering og ein nytte- og kostnadsanalyse av særkilde prosjekt av felles interesse og tverrgåande tiltak.
  3. Støtteverksemd for å spreie god praksis til offentlege forvaltingar når det gjeld bruk av informasjonsteknologi, som t.d.:
    - a) rapportar, nettstader, konferansar og allmenne initiativ som er retta mot ålmenta,
    - b) overvaking, analyse og spreieing gjennom nettstader av initiativ og god praksis når det gjeld tiltak innanfor elektronisk offentleg forvaltning på medlemsstatsplan, fellesskapsplan og internasjonalt plan,
    - c) fremjing av spreieinga av god praksis i bruken av t.d. programvare med open kjeldekode i offentlege forvaltingar.
-